



ՎԳ/4919/05/12

**ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՎԱՐՉԱԿԱՆ ԴԱՏԱՐԱՆ**

Ո Ր Ո Շ ՈՒ Մ

Վարչական գործի վարույթը կասեցնելու մասին

09.11.2012թ.

ք. Երևան

Հայաստանի Հանրապետության վարչական դատարանը հետևյալ կազմով՝

Նախագահող դատավոր

Կարեն Մաթևոսյանի,

քարտուղարությամբ՝
մասնակցությամբ
հայցվոր՝

Լիդյա Դանիելյանի,

«Ինֆորմացիայի ազատության կենտրոն» ՀԿ,
/ներկայացուցիչ Կարեն Մեծլումյան/

պատասխանող՝

«Բնապահպանական ծրագրերի իրականացման
գրասենյակ» ՊՀ տնօրեն Վ. Մարտիրոսյան,
/ներկայացուցիչ Ալիկ Մաթևոսյան/

դռնբաց դատական նիստում քննության առնելով ըստ հայցի «Ինֆորմացիայի ազատության կենտրոն» հասարակական կազմակերպության ընդդեմ ՀՀ բնապահպանության նախարարության «Բնապահպանական ծրագրերի իրականացման գրասենյակ» պետական հիմնարկի տնօրեն Վ. Մարտիրոսյանի՝ վարչական պատասխանատվության ենթարկելու պահանջի վերաբերյալ վարչական գործի վարույթը կասեցնելու մասին հարցը,

Պ Ա Ր Չ Ե Ց

«Ինֆորմացիայի ազատության կենտրոն» հասարակական կազմակերպությունը հայցադիմում է ներկայացրել Հայաստանի Հանրապետության վարչական դատարան ընդդեմ ՀՀ բնապահպանության նախարարության «Բնապահպանական ծրագրերի իրականացման գրասենյակ» պետական հիմնարկի տնօրեն Վ. Մարտիրոսյանի՝ վարչական պատասխանատվության ենթարկելու պահանջի մասին, որը ՀՀ վարչական դատարանի որոշմամբ ընդունվել է վարույթ, այնուհետև նշանակվել է քննության:

Հայցվորի կողմից դատարան է ներկայացվել «Ինֆորմացիայի ազատության կենտրոն» հասարակական կազմակերպության կողմից Երևան քաղաքի Կենտրոն և Նորք-Մարաշ վարչական շրջանների ընդհանուր իրավասության դատարան ներկայացված հայցադիմումն ընդդեմ ՀՀ բնապահպանության նախարարության «Բնապահպանական ծրագրերի իրականացման գրասենյակ» պետական հիմնարկի՝ հայցվորի տեղեկատվություն ստանալու իրավունքի խախտման փաստը ճանաչելու և պահանջվող տեղեկատվությունը (2011թ. աշխատակիցները ըստ հաստիքների ինչքա՞ն գումարով են պարգևատրվել) տրամադրելու պարտավորեցնելու պահանջների մասին, և Երևան քաղաքի Կենտրոն և Նորք-Մարաշ վարչական շրջանների ընդհանուր իրավասության դատարանի 27.07.2012թ. որոշումը, որով վարույթ է ընդունվել հիշյալ հայցադիմումը:

Դատարանը գտնում է, որ անհրաժեշտ է կասեցնել սույն գործի վարույթը մինչև Երևան քաղաքի Կենտրոն և Նորք-Մարաշ վարչական շրջանների ընդհանուր իրավասության դատարանի վարույթում գտնվող վերը նշված քաղաքացիական գործով վերջնական դատական ակտ կայացնելը հետևյալ պատճառաբանությամբ:

Վարչական դատավարությունում գործի վարույթը կասեցնելու հետ կապված հարաբերությունները կարգավորված են Հայաստանի Հանրապետության քաղաքացիական դատավարության օրենսգրքի նորմերով (ՀՀ վարչական դատավարության օրենսգրքի 89-րդ հոդված):

ՀՀ քաղաքացիական դատավարության օրենսգրքի 105-րդ հոդվածի 1-ին կետի համաձայն՝ «դատարանը պարտավոր է կասեցնել գործի վարույթը, եթե անհնարին է տվյալ գործի քննությունը մինչև սահմանադրական, քաղաքացիական, քրեական կամ վարչական դատավարության կարգով քննվող այլ գործով կամ հարցով որոշում կայացնելը»:

Դատարանը հարկ է համարում նշել, որ մեկ այլ գործի առկայության պայմաններում քննվող գործի քննության անհնարինությունը, ի թիվս այլ հանգամանքների, կարող է պայմանավորված լինել նաև նրանով, որ մյուս գործով կայացվելիք դատական ակտը կարող է հանդիսանալ տվյալ գործի լուծման համար էական նշանակություն ունեցող որևէ փաստի վերաբերյալ ապացույց: Նման պայմաններում քննվող գործի վարույթը պետք է կասեցվի մինչև մյուս գործով կայացվի վերջնական դատական ակտ և այն մտնի օրինական ուժի մեջ:


Տվյալ դեպքում Կենտրոն և Նորք-Մարաշ վարչական շրջանների ընդհանուր իրավասության դատարանի վարույթում քննվում է քաղաքացիական գործն ըստ հայցի «Ինֆորմացիայի ազատության կենտրոն» հասարակական կազմակերպության ընդդեմ ՀՀ բնապահպանության նախարարության «Բնապահպանական ծրագրերի իրականացման գրասենյակ» պետական հիմնարկի՝ հայցվորի տեղեկատվություն ստանալու իրավունքի խախտման փաստը ճանաչելու և պահանջվող տեղեկատվությունը (2011թ. աշխատակիցները ըստ հաստիքների ինչքա՞ն գումարով են պարգևատրվել) տրամադրելուն պարտավորեցնելու պահանջների մասին: Միաժամանակ սույն վարչական գործով խնդրո առարկա է այն հարցը, թե արդյո՞ք ՀՀ բնապահպանության նախարարության «Բնապահպանական ծրագրերի իրականացման գրասենյակ» պետական հիմնարկի տնօրենը ոչ իրավաչափորեն չի տրամադրել «Ինֆորմացիայի ազատության կենտրոն» հասարակական կազմակերպության պահանջած նույն տեղեկատվությունը: Նման պայմաններում, թեպետ երկու գործերով հանդես եկող դատավարության կողմերի կազմը տարբեր է, հիշյալ քաղաքացիական գործով կայացվելիք դատական ակտը կարող է տվյալ վարչական գործի լուծման համար էական նշանակություն ունեցող փաստի վերաբերյալ ապացույց հանդիսանալ: Հետևաբար վարչական գործի քննությունն անհնար է, իսկ վարույթը ենթակա է կասեցման մինչև խնդրո առարկա քաղաքացիական գործով վերջնական դատական ակտի կայացնելը և դրա օրինական ուժի մեջ մտնելը:

Ելնելով վերոգրյալից և ղեկավարվելով ՀՀ վարչական դատավարության օրենսգրքի 115-րդ, 117.2-րդ, 125-րդ հոդվածներով, ՀՀ քաղաքացիական դատավարության օրենսգրքի 105-րդ հոդվածի 1-ին կետով, 144-րդ հոդվածով, դատարանը

Ո Ր Ո Շ Ե Ց

Վարչական գործի վարույթն ըստ հայցի «Ինֆորմացիայի ազատության կենտրոն» հասարակական կազմակերպության ընդդեմ ՀՀ բնապահպանության նախարարության «Բնապահպանական ծրագրերի իրականացման գրասենյակ» պետական հիմնարկի տնօրեն Վ. Մարտիրոսյանի՝ վարչական պատասխանատվության ենթարկելու պահանջի մասին, կասեցնել մինչև Կենտրոն և Նորք-Մարաշ վարչական շրջանների ընդհանուր իրավասության դատարանի վարույթում քննվող՝ ըստ հայցի «Ինֆորմացիայի ազատության կենտրոն» հասարակական կազմակերպության ընդդեմ ՀՀ բնապահպանության նախարարության «Բնապահպանական ծրագրերի իրականացման գրասենյակ» պետական հիմնարկի՝ հայցվորի տեղեկատվություն ստանալու իրավունքի խախտման փաստը ճանաչելու և պահանջվող տեղեկատվությունը (2011թ. աշխատակիցները ըստ հաստիքների ինչքա՞ն գումարով են պարգևատրվել) տրամադրելուն պարտավորեցնելու պահանջների մասին, քաղաքացիական գործով վերջնական դատական ակտ կայացնելը և դրա օրինական ուժի մեջ մտնելը:

Որոշումն ուժի մեջ է մտնում կայացման պահից և կարող է բողոքարկվել ՀՀ վարչական վերաքննիչ դատարանում պահանջարկից հետո՝ 15-օրյա ժամկետում:

ԴԱՏԱՎՈՐ  ԿԱՐԵՆ ՍԱԹԵՎՈՍՅԱՆ